



TERTIB ACARA KEBAKTIAN MINGGU
GKPS P.BULAN-RESORT POLONIA MEDAN
MODEL C
MINGGU XVII Dob Trinitatis, 12 Oktober 2025



TOPIK: “Mambaritahon Ambilan Na Madear humbani Gok ni Uhur”

1. Votum – Introitus – Tonggo

P : Riap ma hita jongjong!

: **Ibagas goran ni Naibata Bapa, pakon Tuhan Jesus Kristus ampa Tonduy Na Pansing, Sitompa langit pakon tanoh on. Amen.**

K : Amen

a. Psalmen 23:1–6

P : Jahowa do Siparmahan ahu,

K : Seng anjai hurangan ahu.

P : Ipatudu do ahu bani sampalan na mombur,

K : Anjaha itogu-togu do ahu hu bah parsaranan.

P : Ipahisar do tonduyhu,

K : Itogu do ahu bani dalan hapintoron halani goran-Ni in.

P : Age pe mardalan ahu bani lombang bagas ni hagolapan, seng mabiar ahu,

K : Ai Ham do mangkasomani ahu; tungkot-Mu pakon simambu-Mu do na mangapohi ahu.

P : Ham do na mangidangi ahu i lobei ni munsuhku,

K : Iminaki Ham do ulungku anjaha sirnib do panginumanku.

P : Dear layak ampa idop ni uhur do mangirik-irik ahu sadokah goluhku;

K : Janah sihol do marianan ahu i rumah ni Jahowa sadokah ni dokahni.

P : Haleluya, Haleluya, Haleluya.

K : (Mandodingkon)Ha-le - lu – ya-Ha-le - lu – ya-Ha-le - lu -ya

P : Martonggo ma hita!

Ham Jahowa Naibata Siparmahan bannami, tarima kasih ma isombahkon hanami hu Bamu halani iparmahani Ham do hanami das hubani sadari on marhitei na pasirsirhon haganup na porlu bani goluhnami. Ihatarimakasihkon hanami do haganup panobus-Mu in marhitei parsombahonnami panorang on. Halani ai,

ondos Bamu ma parsombahonnami on na gabe hiteinami mamuji pakon pasangapkon Ham. Pargogohi janah ajari Ham ma hanami mangkagoluhkon dear layak ampa idop ni uhur-Mu, na gabe hataridahan ni hasaksian nami na dob mananda Ham. Holong ma atei-Mu, Ham Naibatanami, jalo Ham ma tonggo pakon pamujionnami on marhitei Tuhan Jesus Kristus Siparmahan bannami. Amen. (hundul kuria)

2. Mandoding Haleluya 401. Hupuji Hupasangap Ham (1+2); do = bes

1. Hupuji hupasangap Ham, Bapa pardear layak.

Ganupan ijadihon Ham, sonai age na masa.

Itompa Ham ganup hape, dagingku pakon tonduy pe.

Napuji ma Goran-Mu.

2. Ganupan tinompa-Mu in, sol sonang bahenon-Mu.

Arian pakon borngin in, sai Ham do na marmudu.

‘Ge uhum bai gomgoman-Mu, pintor janah sintong ganup.

Na puji ma Goran-Mu

3. Hasasapan ni Dousa

Paragenda : Riap ma hita jongjong!

Martonggo ma hita, sopotkon hita ma dousanta hubani Tuhan Naibata! Ham Tuhan Naibata Bapanami, na pansing janah pargogoh na so tarimbang. Ibagas unduk ampa toruh ni uhur, roh do hanami mansopotkon dousanami na banggal in. Gati do hanami lang martenger ni uhur hu Bamu; maruhur sangsi janah taruyun bani na masa i tanoh on. Hotop do soya pangkopkopon-Mu in ibahen hanami. Lang humbani gok ni uhurnami mangkaholongi Ham. Hapansingon pakon hasintongan-Mu pe gati do ipabutak hanami ibagas dirinami, aima halani hagalekon pakon hurang ni haporsayaonnami hu Bamu. Bani haganupan dousanami in, marpangulaki ma uhur-Mu bannami. Ibagas Jesus Kristus sihopkop hanami.

..... (Saat Teduh).....

Riap ma hita mangindo!

Kuria : Ham Naibata, idop ma uhur-Mu bangku pardousa on.

Paragenda : Ham Tuhan Naibata, paridop ni uhur ampa parholong atei hubani haganupjolma. Ihasiholi uhur-Mu do ase manggoluh hanami ibagas holong, damei ampa halayakon-Mu. Tapi gati do hanami lang mangasup mandalankon in dompak hasomannami. Hasadaon i tongah-tongahnami pe

lape songon na hinarosuhkon-Mu. Buei do halak na hiranani bani buah-buah ni haporsayaonami. Hajongjongannami selaku garam pakon panondang, in pe gati do lang ihagoluhkon hanami. Bani haganupan hahurangan pakon dousanami in, marpanganju ma Ham bannami.

..... (Saat Teduh).....

Riap ma hita mangindo!

Kuria : Ham Naibata, idop ma uhur-Mu bangku pardousa on.

Paragenda : Ham Tuhan Naibata Bapanami, simada kuasa ampa na gok hasintongan. Domma ipilih janah ipapansing Ham hanami marhitei Anak-Mu Jesus Kristus. Tapi gati do lang ihajongjongkon hanami pandiloon ampa parsuruh-Mu in. Pingkiran ampa horjanami ari-ari pe, gati do lang songon na hinarosuhkon ni uhur-Mu. Age pasu- pasu na binere-Mu in pe, gati do ibahen hanami gabe dalan laho manundalhon Ham. Ronsi tanggungjawabnami laho manramotkon na tinompa-Mu marhitei na melestarikon lingkungan hidup, ai pe gati do lolei hanami. Bani haganupan panlaosionnami in, idop ma uhur- Mu, sasap Ham ma dousanami in. Amen.

..... (Saat Teduh).....

Riap ma hita mangindo!

Kuria : Ham Naibata, idop ma uhur-Mu bangku pardousa on.

Paragenda : Tangar anjaha haporsayai hita ma Hata ni Naibata, bagah-bagah pasal hasasapan ni dousa.

Mangkopkop haganup do la matei, ase ulang manggoluh bani dirini bei na manggoluh in, tapi ase manggoluh sidea Bani, na dob matei anjaha mulak manggoluh mangkopkop sidea. (2 Korint 5:15).

P : Ibagas holong ni Naibata, domma isasap haganup dousanta. Halani ai, pataridahkon hita ma tanda-tanda ni pargoluhon na bayu. Hasangapon ma bani Naibata i babou.

P/K : Amen!. (hundul kuria)

4. **Mandoding Haleluya 151. Dong do Bah Tubuh Dear in (1+2+4); do=as**

1. Dong do bah tubuh dear in, bai na mardousa in;
Jenges tumang bah tubuh in, pasonang uhurhin.

2. Bah tubuh na mapansing in, in ma Jesusta in;
Isasap do siningta in, ibuat horungkin.

4. Ai ma tongon, ai dihut au gabe pansing homa,
ai holong-M u berean au, ampa na roh homa.

5. **SIBASAON:**

Paragenda : Tangar hita ma Hata ni Naibata na tarsurat bani: **Daniel 3: 13-18**

(Paragenda mambasahon Sibasaon Minggu/Pesta sadari ni ai, iujungi marhitei hata) Amen. Martuah do na manangar Hata ni Naibata anjaha na marimbagashonsi!

Kuria : Amen.

6. **Mandoding 117. Pitah Jesus Hubaen Hasomanku (1+4) do = bes**

1. Pitah Jesus hubaen hasomanku
Ia do na pasonangkon au
Ningon sai tongtong torang langkahku
anggo rapkon Jesus in au lao
anggo rapkon Jesus in au lao.

4. Jesus do tongtong haporusanku,
arta pakon hagoluhankin;
Ai pe tonduy 'ge pe pamatanku,
hu ondskon hu tangan-Ni in,
hu ondskon hu tangan-Ni in.

7. **Hata Haporsayaon**

P : Riap ma hita jongjong! Saksihon hita ma haporsayaonta in, songon na sinaksihonni haganup halak na porsaya i sab tanoh on.

P+K: Ahu porsaya bani Naibata Bapa, pargogoh na so tarimbang, na manompa langit pakon tanoh on.

Ahu porsaya bani Jesus Kristus, Anak ni Naibata na sasada in, in do Tuhanta, na tinubuhkon ni si Maria sanggah nape haliaban, marhitei Tonduy na Pansing, na manaron na parngit, bani panorangni si Pontius Latus, iparsilangkon, matei anjaha itanom, turun hu nagori toruh. Mulak manggoluh humbani na matei bani ari patoluhon. Naik hu surga anjaha hundul i siamun ni Naibata Bapa, pargogoh na so tarimbang in. Hunjai ma la mulak magira laho manguhumi halak na manggoluh pakon na dob matei.

Ahu porsaya bani Tonduy Na Pansing, bani Kuria parsadaan na mapansing in, pars Moran ni sagala na mapansing in, bani hasasapan ni dousa, bani parpuhoon ni angkula, pakon bani hagoluhan na sadokah ni dokahni. Amen..(hundul kuria)

8. Tingting + Manonggohon isi tingting

9. Mandoding Haleluya 311. Rap Pakon Ahu Bod ma Ari in (1+3) do = es

1. Rap pakon ahu bod ma ari in,
Golap pe ari, rap hita Tuhan
Lang dong na legan mangurupi au
pitah Tuhanku hasomanku tong

3. Ham pangajaman, bani goluhkon
Bai parlajouan, Ham hujolom tong
Seng jumpah ahu, songon Ham Tuhan
arian borngin rap au pakon Ham

10. Tonggo Pangapition Pakon Tonggo Ham Bapanami :

Paragenda : Riap ma hita jongjong!
Martonggo ma hita. (Manonggohon na porlu/khusus)..... Amen.
Riap ma hita martonggo marhitei tonggo na niajarhon ni Tuhan Jesus hubanta.
P+K: Ham Bapanami na i nagori atas..... Amen. (hundul kuria)

11. Mandoding 381. Ringgas Au Pararatkon (2+4) do=as

2. Ringgas au mangkatahon Hata ni Tuhan in,
buei do halonganan humbani na hinan
Dihut ma au marulih bai hasonangan in,
janah huhaporluhon mangambilankon in.
Tongtong do marmulia barita ni Tuhanta,
sai lambin tarambilan Goranni Tuhan in.

4. Sai tong marhagogohon, Hata ni Tuhan in,
totap do in manggoluh humbani na hinan
Ai in manogu ahu hubani Bapa in,
ijin ma da igoki malas ni uhurhin
Tongtong do marmulia barita ni Tuhanta,
sai lambin tarambilan Goranni Tuhan in.

12. Ambilan: Roma 1:8-15

13. Manggalang

P : Paima iondoskon hita galanganta, tangar hita ma lobei hata ni Naibata na gabe onjolan banta laho manggalang aima na tarsurat bani Psalmen 116:17-18:
“Bamu ma galangkononku galangan puji- pujian, anjaha goran ni Jahowa ma padilo- diloonku. Bagah- bagahku bani Jahowa, hugalari ma, hugalari ma i lobei ni haganup bangsa-Ni””. Sonari ondskon hita ma galanganta! (*diiringi musik/doding*)

Huahap Do

huahap do holong ni atei mu
huahap do idobni uhurmu
ganup ari ganup borngin
o ..Tuhan

**

ise ma au on o Tuhan
ase ra ham mangidopi
o Jesus..seng tarbilangi hubakku holong mu

ojur au... mangkaholongi
ojur au... lao mangidangi
humbani gok ni uhurku Tuhan
sadokah goluhkon

pargogohi au o Tuhan
togu togu mandompakkon
‘ge buei tumang paruntolon
ase dihut monang au
back **

14. Tonggo Panutup/Pasu-pasu

P : Riap ma hita jongjong!

Martonggo ma hita mangondoskon galanganta hubani Naibata:

Ham Tuhan Naibata Bapanami, harohan ni haganup. Hun Bamu do harohan ni pasu-pasu hu bannami. Ibere Ham do bannami goluh ampa hagoluhan ari-ari. Ham Tuhan, ijon iondoshon hanami do hu Bamu goluh pakon pasu-pasu na dob binere-Mu in bannami. Sai lambin margogoh ma tongon hanami ihasomani idop ni uhur-Mu ampa pasu-pasu-Mu bani na mandalankon horjanami. Papansing Ham ma galangan na ginalangkonnami on gabe galangan na misbou i lobei-lobei-Mu, ase lambin ihargahon hanami tongon dear ni layak pakon pasu-pasu-Mu in marhitei na pasaudhon harosuh-Mu humbani gogoh, pingkiran ampa sinadongannami. Tarima kasih ma Bamu Tuhan. Marhitei Kristus Jesus Tuhannami, jalo Ham ma galangan pakon tonggonami on. Amen.

P/K : *(Mandodingkon Halleluya No. 340:1)*

1. Huondoskon bani Jesus haganupan diringkon

Ia do pasangaponku sadokah bai goluhkon

Huondoskon ma, huondoskon ma.

Bani Jesus Sipaluah, huondoskon m

15. Paingkatkon

P. Laho ma nasiam, janah “Totap ma nasiam, ulang mubah-ubah, anjaha lambin surung ma ibagas horja ni Tuhan in, ai ibotoh nasiam, sedo na soya halojaonnasiam ibagas Tuhan in” (1 Korint 15:58)

16. Pasu-pasu

P. **Jalo ham (hita) ma pasu-pasu humbani Tuhan Naibatanta:**

Ipasu-pasu anjaha iparorot Tuhan Naibata ma ham (hita). Isondangkon Tuhan Naibata ma bohi-Ni hu bamu (hu banta) janah maidop ma uhur-Ni mangidah ham (hita). Idompakkon Tuhan Naibata ma bohi-Ni hu bamu (hu banta) janah ipasorap ma damei-Ni bani tonduymu (tonduyta bei). Amen.

P+K. **Amen, Amen, Amen!.** *(mandodingkon)*